

Chronique rimée de Metz, dite de Châtelain,  
Bibliothèque nationale, manuscrit français 14530/ AD Moselle, Microfilm 1 Mi 13 R3  
(Les deux passages suivants sont extraits d'un complément au corps de la Chronique, sans doute rédigé par un protestant.)

f° 59 r°

An MDXC - Le xiii iour de Ianuier, Iour des petits Rois & soubz le Gouvernement Mr Sobole, furent constitué prisonniers Didier de Ville, son fils Ian de Viller, Mr Noblet, Nicolas de la Prinserie & quelques autres accusé comme le bruit estoit d'auoir quelque intellige(n)ce avec les Lorrains, qui pour lors estoy ennemy au Roy Henry iiii Roy de France & de Nauarre. Et au mesme temps & mois la guerre fut declaree des Messains contre les Lorrains, & ceux de Metz se fortifiant d'hom(m)es comm(enc)erent à courir sur le pais de Lorraine. Les Lorrain d'autre costé sur les Messains se prenans & rençonnans les vns les autres. Mais le plus gros du hutin tomboit sur les paysans sur leurs cheuaux & autres bestail. Lors en mesme temps arriuerent en Metz les compagnies venans de Sedan & S Menehou & aussi quelques Reistres Allemans puis ceux de Metz sortans au champs prindre(n)t plusieurs Chasteau & autres places fortes à l'entour de leur ville y mettant garnison. Le xxvii dudit ianuier fut tué le nepueir de Mons de Sobole devant Aix la Cunegi, Homme d'Armes de la compagnie dudit Sobole.

Au mesme temps la gendarmerie du Pont à Mouson sortirent pour aller piller le village de Lorry proche dudit Pont à Mouson. il y auoit lors audit Lorry quelque habitans qui faisoient profession de la religion reformee. Les maisons desquels furent toute pillée & sur lesquels lesdit Lorrains exercerent toute sortes de cruauté les plus que barbares. car ayans prins quelque habitans dudit lieu il les firent cruellement mourir com(m)e entre autres vn poure vieil homme aagé denviron iiii<sup>xx</sup> ans, lequel en haine de la religion ils rostirent & firent brusler à petit feu, decouppant à d'autres leurs oreilles en fleur de lis. (...)

Environ le xxv dudit mois de Feurier Iour de S Mathias de ladite annee les Messains & les Lorrains se rencontrerent entre Bouchyre & le Pont à Mouson & se combatirent de telle sorte que les Lorrains perdirent la bataille & furent entierement deffait & mis à val de route & toute la fleur de leur gens mis en piece estant poursuiuus par les Messains iusques aux Portes du Pont. (...)

Quelque temps apres les Lorrains s'assemblerent & ayans prins toute leur garnison & amassé ce qu'il peurent de ge(n)s vindrent assieger le Chasteau de Mardigny et autres places que Ceux de Metz auoient prinses peu auparauant . Ledit Mardigny fut donc le premier assiegé & canonné. La bresche faite la place fut rendue aux Lorrains & ceux qui estoient la en garnison enmenee prisonnier au Pont à Mouson.

Et tout en s'enfuyuant il allerent assieger le Chasteau de Louvegny dans lequel commandoit pour ceux de Metz un sergent de compagnie nommé La Roche qui se defendit brauement & tant qua la fin le canon ayant fait son debuoir & la bresche estant faite, le fort fut prins d'assaut & pillé par les Lorrains & La Roche qui y commandoit avec huit autres pendu à vn arbre proche dudit Chasteau de Louvegny puis userent de plusieurs cruauté pilla(n)s & rauageans, tuans & massacrans & violans filles et femmes, dont y eut vite extreme desolation sur les poures villois des villages d'alentour.